

明大政纂要

明大政纂要卷之五十八

明都察院右副都御史四川巡撫茶陵譚希思編輯

嘉靖三十七年戊午春正月庚戌朔

命戶部發銀十萬兩濟大同之急

大同自納虜婦桃松寨之降虜酋圍困左右威平四衛日急於是總督楊順上書告急總兵龔業巡按路楷亦言城中勢甚倒懸危在旦夕上聞而大駭命戶部發銀遣才幹郎中謝毅督運濟之

鄆縣民王金獻芝山

聚芝百八十一本內有徑一尺八寸者數本名曰仙應萬年芝山以祝聖壽上悅賚以金帛

二月戶部尚書方鈍條上便宜七事

是時天下財賦歲入太倉庫者計二百萬兩有奇舊規以七分經費每存積三分備兵以爲常嘉靖己酉以前歲支最多不過二百萬兩而其少者乃僅至七八十萬及庚戌虜變後每歲調兵遣戍中外所增兵馬數多餉額增倍及乙卯丙辰聞而宣大虜警益急一切幕軍振卹等費咸取給內帑歲無紀極故嘉靖三十年所發京邊歲用之數至五百九十五萬三十一一年五百三十一萬三十二年四百七十二萬三十三年四百五十五萬三十四年四百二十九萬三十五年三百八十六萬三十六年三百二萬計太倉歲入二百萬之額不能充歲出之半由是度支爲一切之法其斂財賄增額派括贖算稅契折民壯提編均徭推廣事例興焉其初亦賴以濟匱久之諸所灌輸益少值四方多事有司往往爲地方奏

畱且請免如浙直以被倭川貴以採木山陝宣大以兵荒不
惟諸軍興徵發停格卽歲入二百萬之額且虧其三分之一而
內庭之賞給齋殿之經營上時以半夜出片紙徵取無敢延
頃刻者會大同右衛告警邊臣奏討日急尙書方鈍等憂懼
不知所出乃條便宜七事其一議處各邊存積鹽引欲將嘉
靖三十四年以後存積未中者照依原價每銀一錢加三分
召商納銀太倉特行起掣其二議處各邊開派鹽引願改納
折色者許量增分數不爲例其三議處南京倉糧暫借三年
改折一半轉發太倉銀庫濟邊其四議處南京本色逋賦改
追折色通限一年內完解違限不完者仍追本色其五議各
處拖欠本部錢糧通限一年內完報其六議處各處鹽課鹽
稅悉輸本部發邊其七議處贓罰事例稅契民兵等銀疏入

得旨大同右衛危急此策但可備將來之用不堪應卒且門工未完工部贓罪銀亦不宜遽請鹽引並折糧等項如議行因切責鈍等謀國不忠令再議明日鈍等請先發太倉日逐續收庫銀五萬兩及紫關新城倉浮圖峪等客兵米二萬石兼程運至大同以濟急用又本部題准空運監生俱送吏部搭選

三月調御史唐自化爲大理寺評事

自化催糧山東還薦按察司僉事周世遠益都知縣張鵬皆循謹稱職俄而二臣爲巡撫傅頤所劾吏部左給事中劉賡糾其舉劾互異下吏部都察院覈狀覆言自化偶以一時承遣其各官賢否所聞未必得實當以頤言爲是上然之世遠調簡僻鵬閤住自化不諳憲體改別衙門用

蜀府承燭薨

逮繫楊順路楷許論罷方鈍改南京用

刑科給事中吳時來言總督宣大侍郎楊順自蒞鎮以來所請帑銀無慮三十餘萬而該鎮兵食虛乏虜患猖獗順往往殺愚幼小民以報首功卽如桃松寨者虜中一逋逃淫婦耳順旣失策納之又輒矜示朝廷比黠酋喝脅又駕言易我妖叛失體損威臣民無不歎憤而巡按御史路楷受其賄金七千秘不以聞至於首級楷旣驗有炙疤痕又多幼小乃曰賞疑惟重兵部尙書許論亦雷同附和奏之順遂叨世廕隆典無章甚矣昨遇春推撫臣醉臥不出他可知也疏入降旨楊順路楷錦衣衛遣官校逮繫來京問其總督事令兵部侍郎江東急去暫理許論令爲民方鈍改南京用已乃起原任兵

部尚書楊博代論改刑部尚書賈應春於戶部代鈍

陞鄭曉爲刑部尚書

福建提督阮鶚有罪詔錦衣衛遣官校逮繫來京

鶚狡誕貪縱原無應變才略初以講學要取虛譽旣督學浙江諂奉趙文華胡宗憲文華遂奏設福建提督以鶚爲之鶚在閩不措一籌而極意以自豐殖諸所加派動千萬計歲時納厚賂嚴世蕃所爲根盤計至是御史宋儀望疏發其奸給事中劉佑繼又奏其十罪上覽疏大怒遂命械治之旣逮至嚴嵩爲請於刑部尚書曉不能堅執薄其罪讞上詔黜爲民黜遼東巡撫副都御史蘇志皋爲民先是虜入遼陽廣寧志皋不發兵救援且妄報首功剋減軍餉給事中張益劾其狀故黜之

給事中吳時來主事張翀董傳策並以論劾大學士嚴嵩謫戍
烟瘴

時來論嵩輔政已二十年文武進退悉出其手又私令其子
世蕃入直爲之票擬章奏納賄招權凡邊臣苴橐先入世蕃
後達嵩所遠則趙文華王汝孝張經蔡克廉近則楊順吳嘉
會皆剝民膏以市私交虛官帑以實奸竇給事中袁洪愈張
燈御史萬民英亦屢及之矣顧多旁指微諷無直攻嵩父子
者臣竊以今日邊事之不振由於軍困軍困由於官邪官邪
由於謀國之不忠翀疏曰臣竊觀國家有三大政皆嵩父子
壞之督撫將帥始進不擇其才行賞不論其功修邊築堡不
覈其實而國家防邊之政壞矣錢糧以十分計之四分輸邊
六分餽嵩父子及其家奴永年而國家理財之政壞矣嵩旣

以虎狼之威得世蕃爲爪距取朝廷名器爲己騙局而祖宗二百年來所培養忠臣節士之氣又至嵩父子壞盡矣傳策疏曰陛下試檢之嚴嵩家當有富於內藏者吏兵兩部選官至持簿入嵩之門任其填發故俗呼文選郎中案爲文管家職方郎中方祥爲武管家採木侍郎劉伯耀提督尙書趙文華所侵盜官銀以巨萬計皆航浮卒輓歲時浸潤天下藩臬諸司相與則而效之驛遞爲之騷然公帑爲之耗損有君無臣誠可惋惜陛下何愛一嵩父子以快天下之憤增三軍之氣乎時大學士徐階雅不與嵩同道嵩意思之時來與紳皆階門生也傳策松江人與階同鄉而時來又先任松江推官疏入嵩大疑階密奏三臣同日構陷必有人使之且時來已遣使琉球欲藉口自脫得旨邊臣不忠欺君禍國已處治矣

時來原非真心爲主本譏朕事玄忌政故先言一二遠臣以
及首輔此必有主使同計者又日久奉使不行輒以亡命自
代假此沽名錦衣衛其逮送鎮撫司嚴行訊鞫同狎與傳策
各追究主使之人以聞已而三臣遞對詔獄百方掠訊備極
楚毒竟不言主使者曰此高廟神靈敎臣爲此言爾鎮撫司
乃以狎傳策相爲主使併時來俱以誣罔成獄獻上詔俱發
烟瘴衛所充軍

夏四月黜原任大同巡撫朱笈爲民

褫原任大同總兵龔業職罷副總兵王尙忠還原衛而以致
仕參將尙表代領副總兵事時右衛被圍六月餘笈以候代
離任業以養病臥家獨尙忠在鎮御史欒尙約言其廉雅有
餘而勇略不及尙表因並劾笈業避事負恩狀故有是命

明大正集要 卷五十一
五
浙江總督胡宗憲獻白鹿

鹿獲於舟山

大同右衛圍解

比桃松寨來降虜又聞參將尙表運餉入城乃移大營內牧
俺答駐右衛城西南黃台吉駐東南脫脫駐西北各去城三
舍許由是內外斷絕斗粟束芻不復能進城中亦無一人匹
騎得出重圍者尙表初以閒住官運餉而入旣爲虜遮遂竭
力爲城守計虜來攻輒擊卻之及被圍久虜閒及妖叛人等
日往來城下爲言恐嚇導以殺虜之利城中人心始終無一
搖動者至是侍郎江東巡撫楊選總兵張承勛選集主客兵
數萬嚴部而進虜聞大兵至悉拔帳北遯東等遂以是日入
右衛城所運糧凡四千餘石居民焚香夾道出迎老稚婦女

皆感泣呼聲震地自以爲再生也初虜圍右衛急上屢問計於嚴嵩嵩意欲棄之而難於發言則對本兵許論前總督宣大知彼中事狀甚明請問論遂言右衛遠在大同西北故設爲難詞欲上自棄之上聞言益憂念亟亟爲措餉爲發兵爲更易文武大吏賴聖意所嚮百司凜凜趨事而虜尋引去尙書楊博以右衛解圍聞上喜徵侍郎江東還賞總兵張承勛李賢巡撫楊選副總兵尙表等銀幣有差

五月命尙書楊博畱鎮視事

從給事中張學顏之言令其專意綜理右衛也

總督尙書楊博條上十事

塞銀釵驛馬等嶺以絕虜窺紫荆倒馬之路備居庸南山一道以絕虜窺陵寢畿甸之路修羊房神池諸處牆塹以絕虜

入山西之路一選練兵馬一修築堡寨一經理隘口一申明職守諸邊獲功不惟巡按御史毋得與賞雖本兵何與焉蓋勘功罪者御史也擬賞罰者本兵也一寬假文法言邊方之弊大概有三文移太繁責效太速議論太多一痛革殺降一久任將領一嚴禁私通一查處軍器疏入下所司覆議報可六月禁在京諸司不得各自受詞

刑部尙書鄭曉等言故事在京官民詞訟俱赴通政司告送法司問斷各衙門有應問者亦參送法司不得自決比來事權不一諸司各自受詞不復參送甚有私抵贖以爲利者且其間拘禁箠楚或妄以意見出入顛倒法令致良善苦於紛拏奸頑喜於詐害請申明會典條例令各衙門通行遵守庶政體歸一抵罰亦不至乾沒疏上得旨時南京上元縣有越

獄之變南京刑部尚書馮岳亦言各衙門濫受民詞不送法司讞決故淹禁日久至於生變請盡錄繫獄囚隨重輕決遣之而嚴有司侵官亂法之禁曉因覆其奏以請報可

逮參將周現至京論戍革其世襲

現故總兵周尙文家丁也尙文死居總兵徐仁幕下會開馬市現以素習虜情得承遣往來至是分守拒門助馬等堡偏近虜營總督尙書楊博疑之以爲此輩視虜本同一家今乃令之守險拒虜戰必不力急則反爲虜用上然之命錦衣衛捕送法司從重治罪旣而法司勘其通虜原係公差但拔自行伍中冒濫官賞宜革奪耳乃發遣

令議遼陽海運

總督薊遼侍郎王忬奏遼東三面直虜爲西南隅山海一關

通道京師卽今歲大祲斗米八錢民饑死者什八九議振議
蠲別無良策臣謹按山東遼東舊爲一省近雖隔絕海道然
金州登萊南北兩岸閒漁販往來動以千艘官吏不能盡詰
莫若乘其勢而導之明開海禁使山東之粟可以方舟而下
此亦救荒一奇策也又言宣大遼東俱係京師支輔乞照例
空運通倉米給軍上皆從之旣而給事中許從龍因請就海
道以行空運或將天津倉糧從黑洋河一帶抵昌黎登岸達
山海關或將登萊等處起運錢糧量發近海民船從沙門島
一帶抵金州達遼陽此可省陸輓之勞官民兩便下戶部議
行彼處海道官覈實計處以聞

令建橋設關於峽江以禁廣鹽

先是江西一省派行淮鹽三十九萬引後南贛吉三府改行

廣鹽惟南昌等府仍行淮鹽二十七萬引既而私販盛行輕舟疾槳所在而集如袁州臨江瑞州三府皆私食廣鹽撫州建昌廣信三府私食福鹽於是淮鹽僅行十六萬引數年之間國計大詘巡撫馬森因上疏極陳其害請於峽江縣建橋設關禁遏廣福私鹽之路仍盡復淮鹽原額稍增至二十七萬引收其稅課以足國平其時估以通商報可

巡撫南贛都御史周滿予告起原任都御史何思代之盜殺原任安慶守備黃佐於江中

巡按御史董鯤等以聞且言江防汗漫守臣易於推諉請以池州府及安慶守備並聽九江兵備道節制上從之

改遼東苑馬寺卿駐劄金州

給放各島商船不得抽稅從都御史王忬及御史周斯盛疏

通海禁議也

秋七月黜兵部左侍郎吳嘉會爲民

前總督侍郎致仕何棟冠帶閒住初嘉會爲御史萬民英論劾下獄候勘至是給事中袁汝寔御史凌儒自薊鎮還報論嘉會前後修邊冒破銀十數萬又嘗索撫賞銀於三十六州縣一時庫藏爲之盡空因並劾前總督何棟楊博張祉今提督王忬等欺罔之罪詔刑部會兵部議而鄭曉等覆言諸臣罪有輕重故有是處

命給雲南銅鑄錢如例

上以雲南產銅不宜惜小費以虧用故也

御製承天府元祐宮碑

命工勒石其詞曰承天府爲我皇考睿宗獻皇帝疇昔分封